

KOTAVUSA VIRDA


KOTAVAFA VIRDA VESTASA VA TAMAVA IS ARAYEEM MU AYIKEEM

Toleaksat ke 2023

4^e otuk

Kotava, tela tamefa golerava
Va ina kosmac !!





IZVA IS ARAYA

Hochdorf ~ Naboxa ke Azilugal

Naboxa ke Hochdorf tir sersafa tcarma ke keltaf gejik ke taneafa rekola ke Azilugal, kosmayana bak 1977-1978 koe Hochdorf an der Enz tis revava ke Eberdingen lenttalte Stuttgart koe Germana. Vayayana bak 1979 va kulapaf caxaf mukeem al bilder.

Izvafa is tawavopafa orka

Naboxa tir evlafa gu tena ke -VI^{eafa} decemda (moni -530/-500) ise tir ke Hallstatt araya. Tir ke lana rawopafa belca dem konaka naboxa ke Boii sersokilik banugale bliyis. Bata belca koe lentalpaf birtey tawavopon tigrir, trabe koe coyuntapa male Paris azeka kale Ceska dem geefa Germana is Swiza is Ostera. Bato sersaxo tcastafo uton ice gejopafo kooxo va kazafa moortera stujoyed, tulon sersaxo ke Vix koe Bourgogne gola, is Lamone Pemaxo koe Doubs utca koe Franca, is Heuneburg folkayenafa ralma poke Donau bost. Vuestes debak koe Halstatt koe Ostera tigrir.

Rawopafa orka

Bata naboxa leve tawafa tcarma besanafa gu rapor is xakolafa gu 60 m- is uldinenon ontinafa



gu mon 10 m-xanton tigiyr. Sugayan fukap dem dzeta yombanafa gu inta is dem toloya milavafa yultava kum intaf trink idjon



ice tcarma tiyir, i kum trink lumaf gu 7.4 m- x 7.5 is 4.7 m- x 4.7. Darka wale toloya yultava gu rapor vas 50 decitor zo riyuyur ape enide caxadebak gu rotis elakesik di zo nendoyeyer. Bak tiskiyis ugal, kepaita besasa va fuk ve atitsuyur aze tcarma tuwavon vwaweyer. Kali kosmara, naboxa wan tiyir envarafa nume va xim ke lane ayikye sivakon bluctekirafe is mukeem vas burkafa kuluca di robildeyer.

Burkaf mukeem

- Tela loburkafa muka tir teca saxatca kum moavayaf iyekot, i kline ilava evlon gu mon -530 AGJ, lize alto ke balemsandafe ayikye daykeyer. Va bata mukinda denu Etrusci arayik logubeon trasit voxen zikexa ke bata saxatca vas konaka ordon keltafa kira ruldar. Kle bato guto rotir zo kobureyer aze zo tolzikeyer ike gan keltaf yambudik zo ksudayar. To tir antaf grupen tulok dene Kelt saneikeem. Tadle ke zikexa tir dem ranyes korik moe krafol giskis va deba. Keve geuk ke saxatca, korik gu ardova zo kaatoeyed : baroya tola dem takakadis korik va sint lentegis. Bat ervokiraf korik gu stutesik ik gejik bak migafa stutera zo pilkomodad. Toloya eda otson zo volayad ; ayikye dem dug is prosil koe nuba moe kota eda ranyer.

Kotavaf Izvugalayak [-1000 – -800 : Europa]

Sinka is Anameda — Irubara is Vegedura — Ckane is Gandura — Yamba is Miga

MIDURAFE CKANE



Dezarkara

Valente Europa, miduraf xekeem vion al towar. Demadezark, vey iriga-gama wan tiyir gorack ke tawamidura. Tawadayik va konaka ruxacka dum olyub is dent is xot is urt wan midud. Jaftolaf bonoleem koe gola dem lowawaf sid wan tid zolonaf. Koe krimtaxo, sinka dere tir dem kabaya.



Kirkakorafa fiumta, Roma, Italia

OPELAF VREDA

Koe Italia bak Azilugal, tawadayik koe baplatawaxa dem intatrinkeem giskisa va koridafa kepaita irubayad. Tawoldafa teza ton caxafa fiumta guon zo ksudayad. Taneafa wida zabduyuna koe Roma bak X-eafa decemda tiyir dem kirka dum bata.

• Balemkolafa is balemkrafolafa eda dem wastas ugol va ronefa rebava ke naboxa kereler ; voldum aryon naboxa me zo grikseayar. Inafa azeba tiyir vajapayana gu iyekotafa porma.

• Lerdoya uliranola tiyid levrumkayana bene rebava : anyustoya kum jaftolafa nola (ke *Bos primigenius* katca) is tanoya logijafa kum azil tiyid besanafa gu moavaf toaz.

• Trigap kobureyen mal Ellasa is dis va ceke vas mon 500 inoc ; conyuta ke koldulixa koe ludev zo katrasiyid. Baroy krapol kum iyekot va doma ke gadela ziked. Toloy ke sin tid male Gijafa Ellasa vox bareaf tir ke lizukafa iara. Ban bareaf krapol va tupilkara va vola xantafa gu Roneka ke ayik ke toza ke taneaf azilugal vrutar. Va rietolk ke keltafa araya bam rokaatoer, i ke araya azon vonewesa nope manyona uzera do Roneka, tulon kan tunoawesa birafa kazara.

• Alto ke awalkik tiyir do moavafa roga isu bergak



isu nubaskak is dere konaka gedrafa imizxa, kota besanafa gu moavaf toaz.

• Jontik iyekotaf pormolk don konak kobureyen mal Ellasa, vox dere konakar darsafa muka is tcekak is tcata.

Caxafa miga

Ordafa gu naboxa ke Hallstatt araya, eda va rundapa kereler kire va kabdunedira va alto isu remburera bak caxa ape co zanudayar. Dile okol zo westayad aze do awalkik konaboxayad. Wori koe rawaopaf debak ke Hochdorf, meka conyuta me zo katrasiyir. Dum aryona sersafa naboxa ke mila rawopafa belca, watsa va caxaf lorot tir divedjapafa ; trigap ape tiyir kotraf gu ulida isen jontikafa porma is lerdoya uliranola ke Hochdorf jupad da va atayafa vorulira dositasa va caxafa miga trakut.



Nuyafa ewava male internetxo :
<https://commons.wikimedia.org>

Internetxo : **Kotava : langue, littérature / ava, suteroteem**

<https://kotava1837481.wordpress.com/2018/11/15/izvugalayak-1000-800-europa/>

NYOFARA VA AZIL TUYAVAWER

Azil koe to Pokefa Roneka moni -2000 ta iara va jontika amidafa ervoinda isu xekinda toz zo malsaveyer. Voxen konaka decemda di tiyid adrafa abdida mancoba koe Europa dilizeyer. Oyam moni -1000 koe banugale Ellasa lize koe naboxa va azilxa wetce firviks pu awalkik rotrasit.

Awira ke azil va dimblira ke ellasaf seltay is nopefa vanke-dara ke widsoka ke Pulukugal al yordapar. Azil tiyir guntas loon dam lut kiren inaf kawot sotir tigipis. Kan kalvekafa egara, va ervo ik xeka dem delapafa gabexa rowarzer. Soe ta divoksera va azil gu kawot, seotana idulotapa koe cade sotir adrafa.

IYEKOTAF KUDJAMA


Nyofara va iyekot tiyir zaskafa koe Sardegna bak -IX-eafa decemda. Tulon katclafa kudjama kaatoesa va gejik is okilik irubas koe gijarotifi raporafi widaki dem ontinafa rebava is rasek zo warzeyed. Koti widaki tiyir deba ke lizukaf nafalik ik staba.



Iyekotafa kudjama,
Sardegna



SUTEROT



Va Enide tudir nusayá, kotviele kona sinafa lospa va jowa vanniyir, pune kan jinafa gubefa tra jontikote tcekayá, voxe tceka tolke vom sin lubeyed. Sin va tageltafa ervosoluma batkane tavuyud nume en foliyid da iyela vome lana titickafa soluma anton tigiyr. Wori, va lana budaxara videyed, i va zekasisa is turintasa edje izgon ice aalxo men tigiyr, nume va bitej gu jinafa wira wan palseyed.

Kepeyeson, va sinafa guyuca tulegayá, aze, ba teveafa gazda, lent jin valev duelapa arte baroya trasolumacka milk va int player.

Va mefavlaf tcekasuray vere stakseyé. Bam, sinafa obrara loloon komodeyer nume nira tunuyaweyed lion dam bak toza ke jinafa tiskira.

Tiyir gorukaf bartiv. Jinaf ast buupuyur eke taneon pesteyé poiskaf. Keyé, lecen eroyaf direkeugal va tanoya tceka rupteyer. Ede bata vol co-lajupuzar, rotir meveli Xipehuz tisik zo co-djuprobagalatad, nume battode, tokkane co-rogrupeyé kase kona ayafa vordava va sin sobakar ?

Wori, abicabicon jinafa kuranira xultuyur, va ast

smilkfeyap izgon ice aal mezekason tigiyr ; inaf sizuntas bitej van jin rwodeyer. Granafa tra atceweyer ; ko rid tceka azdason malniyr... aze Xipehuz tisik, uzayan, lubeyer aze licaweyer ise turaporaweyer.

Mamtafe ie ke xultura div jinaf ast bimileyer. Masotceson, wendeson, va Tanik grewayá.

Kle, sin tiyid robakan gu ayafa ervo, i bat mayakaf Xipehuz tisik ! Ropokoleyat da va sin di rovilayat !

Bam, mekivason, iskeyé da jinaf ast buuyur, iskeyé da saipafa lexa mamayar, jin gripolepeyes va rekeugal ke intafa zaava, jin, valeve remnira ke koceem is faltaf vewuk ke bup, jontikviele patavayas da bal tol-decemda datafa tamava kev Xipehuz tolgenira va twawera ke intaf kimeem co-pestaleter.

Voxe wori, viele alban Miel gin stiyir, i trakus Miel, pune izga mo jinafa tierduca lubeyer, i mo niga icde voldokruldera ke ayik do Xipehuz tisik. Icde vanmecobara va bantol gotitisa volokafa kreda ta blira ke battol.

TOLEAF DOV

VII : Bareafa rekola ke neva ke Baxun

1.

Gertik is guazik is okilik va jinafa nega skebunon al terektayad ; otson ic beto antiaxo vultesik va warzotany tolkaliiyd. Pirdotap benplekuyur da gejik ba teveaf taelcek ke 22649^e ilana koe

Mesur Asar va sint di katanayad, ise katcilik va baerdafa geja tujdeyed. Lo vuntoy Zaxelal gejik vanvulteyed ; jontik lyumasik ke ezefa zaava (Dzum is Sax is Xald) jekun gan sposuca artlaniyid enide va bat cosap di pomayad.

Ksur gan sanoya tcekasikafa ema zo ivamudayar, voxe kota tcekara kev Xipehuz pendanaca tineyer, nume xeyaf gejik jontikote xonukayad.

Bam, remi konaka safta, eaftacapa dene ayafa ervolia abdivodayar...

Ba bareaf viel ke anyusteaf taelcek, ervokiraf gu wed dem gemaf uul, pu yone meropatane sane daktey  da va Xipehuz tisikeem ant fu lyumay , pokoleson va vilara va budaxara awisa kev ageltuca ke jinafa nega.

Loum is Demja is Anaxre, i nazbeikye, va jinaf goraks tizon tsuneyed ise va jinafa runda me djunariyid. Ise Loum kaliyir : « Me rolanil lecen ba rinafa xonukara kottan folitir da Xipehuz tisik tid volrobakan nume ayazaava di xonukatar. »

Demja is Anaxre is jontik okilik milinde pulviyid, ise kruptey  da bat karolaks tiyid malyaf nume buluy .

Bam, Loum va jinaf wed dem nolanubelt konariyir aze va awalkolafa jowa remlaniyir nume Xipehuz tisik kaliapon vanniyyid. Tan wilupaf loon dam kotar, fu uzayar, vexe Loum rukuzaf loon dam kramol mangiyir aze va Xipehuz tisik anamlaniyir aze welvupuson kevlaniyir ise va opafa nubema flexayar.

Mezekase sane wiyid da kevelik atitsuyur aze licaweyer ise turaporaweyer. Vuntoya puda va faltafa gazda ticstiyid, voxe Loum ixam dimlaniyir aze va jowa vomlaniyir. Inaf aliaf yolt vanmiae ervolia priduyur.

2. Taneafa meldara

Bak 22649^e ilana ke tamava, ba pereaf viel ke anyusteaf taelcek.

Ba vanafiz, azra mamayad ; gamiafa myelga va iyekotafa biota ta meldarapa tazeyed. Decemoy ebeltaf ayadol is tol-decemoy okol gan gertik zo vikeayad, ise alub-sanoye nazbeikye do jin va Tanik blikeyed.

Awalt winta ko kerafa gazda koartokaweyer, okilik kabdue ervoliaredjel tcepayad, kizoyura ke dılfura do trucafa vultera ke vuntoy lyumasik laumayar.

Nazum grelt, taneon, va volnik domuyur aze luymara tiyir pelkafa. Tore axaf is dolisten gan yona bulafa vordava, gejik fure raveyed kane va Xipehuz tisik godendayad ise rovilayad. Bam, kot cos (Zaxelal is Dzum is Sax is Xald is Xisoastre is Pcarvan) buus dum welfa, va azeka is aalxo belcon tolgeniyid aze va amlitaf kevelik kotliz ivamudayad.

Jontikedje meld tiyir krogaca ; staksik dun artlakiyid aze pu gertik givayad da ayik decemdecemon xonukayad, voxe sinafa awalkera zo jaxadayar.

Ba anteyas bartiv, Sudar nazbeikye dem tuzaf nugeem, stakseyene gan Loum, piyir aze pu jin kaliyir da, sotre kot vilan Xipehuz tisik, tol-sanoy minik xonukayad. Jinafa gloga tuebeltaweyer

XIPEHUZ TISIK

ise takra tupoiskaweyer, aze jinaf kutceem prejayar :

— Coba tir inde ant Gadik kuranir !!

Aze setikeyeson da otara va gejik va vunt-balem-kune woda al naavdayar ise grupeson da Xipehuz tisik tiyid mon balem-decitoy, trakuyú da bareacapa ke datafa ervolia su xonukayar, voxe tawava va ayik di pasuyur. Okie, goxe ervolia rotir me di stapeyer.

— Kle tir cenera ! ~ gabenton prejayá.

Vexe edje va batcoba modovayá, pune kizoyura ke meld va aalxo lopoon skotcesiyir, aze, flavaflavapon, gejik dimawiyid voxe kot van giwasa jowa faxieson otceyer.

Bam va Xipehuz tisik wiyir, sin va dom artniyid, mea mebelcon dum gazdon, vox ton ivamufa lospa sotre tolsana is vodjus va intaf tey van istak. Tuke bata tirká, merobakan, van minyon voljupekas gejik abduniyid aze mayakon stakeyed.

Tiyir surterapa.

Lolaof lyumasik va otcera anton modovayad. Wori, nekev sugawalkera tuebeltasa va jinafa gloga, va baliáf fiukeem keon dizveyé, djupotrasison va kona wayotera va mana xaka, lecen jort is kevjiva jontikviele keveon sokirubad.

Bali va jin gu toloya kosmara yoke bata dirnura va undera gableyer. Taneon katcalayá da lize minaf grelt jontikote tigiyyid voxe Xipehuz tisik abicote, pune stakera, taneon meropatana, illaumayar darpeda vordava ke volnik leleon uzayad ise jontik dendanik moi liafa spikonara madagiyyid. Tel loprantaf va gla tere dace cugeke acagiyyid nume nekev yona tolaskina dila wán otceyed. Larde konaklize moe meldxo mila wica konakviele dilizeyer, pune rovezolteyé da Xipehuz tisik toz cueyed ise sinafa vilasa gijarotiuca va lana kima me kaikfiyyir.

Toleaf katcalaks fikunton tukotras va taneaf, gan Xald lospa zo deayar. Bat kimtaf korik, iste jontik volnik, ilfolis va intyon wedam, va luc divsidayad aze gu flavoda zanieyed batkane lasuremlaniyyid. Batcoba va jin akoyepeyer lecen jupekayad. Va Xipehuz tisik tuvolmilbavawes yoke yona vordava sotre san-tolda, is mon lik ke Xald ervolia divvawas rem fenkune fe, wiyir. Vexe inc, manaca, lyumasik (tulon konak okilik) zanies va iyekotaf gor lodam luc, alieson va volnik va int tire atayad. Dere gokatcalat da flavodara va Xipehuz tisik bakansayad lecen lubeyes tisik kotote wiluon madagiyyid aze gin onkayad. Va jontolaf kosmaks gu zolonacapa icde direkefa lyumara soe torigiyyí.

Wori surterapa wan dilizeyer. Cenenikafa otcera va tawava taulesiyir ; abdi siel, vanmiae Xipehuz ivamu, minaf xonukasik is konak decemoy lyumasik tice aal anton zavzagiyid. Bali ke kot bantan tiyir eaftafi kire gan Xipehuz tisik avplekus va kunoy tey van bravakiraf gameem zo anteyayar. Remi konak bartiv valeve keltap, sinafa mayakafa iera tauleyed.

3. Baxun zo dasugdar

Direvielon, sane va moblisik otayad. Droka ke bat meld efe tiyir vas mon lerd-decitoy ayik ; utcorafa gunestera bazeyer da tazdaks ke Xipehuz tisik tiyir vas tev-decema. Battode xonukara ke kot volnik va san-aluboy ayik al tapileyer.

Gripokolera koe takra inkeweyer, jontiktan va okilik ienayad ise va mayakafa tegira djujovleyed. Batviele, prejambon, ist pemaxo abdulaniyí aze va nyukuca ke gloga pu gejikeem toz culimepeyé. Eruyú kase min isket da kot ayik di xonukar vode lodame va pak di wetat ; danediyí da arti sanda Zaxelal coyunta gan tazukindeem di zo tolgeniyir, az arti tol-sanda va Xald vo isu Sax isu Pcarvan isu Xisoastre ; aze, batkane divmodayason va sinafa jiluca, jupayá da dosteyed da va teveaca ke crakefo tawavo ixam al dimdigiyit ise volnik ko aalxo barkrilon al zo malplatiyir. Adim va jinyon dizveks goleyé, jupayá da gildayad da Xipehuz tisik me tiyid merocuesin ise intaflavoda rotrovgayad nume sin va robakana kerdela di govedivnediyid.

Amlitap moe azeka gazayar, pokolera va jontikote terektas gejik gin denfiyir. Ise ta laumara va dirnura, va konake gestane de kum inta pimtayá, i va de ta belcon diltura is rojura. Seramuca gin mopleweyer, sane va jinafa pulvira permuyud nume okilik va intafa dirgara tit jin rundayad.

4. Artazukera va ervoeem

Remi konak azaf viel, va aal jontikote volmiv balieyé, ise va teza va bagaf roburen karniz ziliyí. Batse fliotafa pimtara : orala dem abrotce vas peroy ladavacek is mante vas toloy, gluyana gan konak oblay gu koefa orala dem mante vas tanoy ladavacek is abrotce vas aluboy. Tevoy ayik (toloy buresik is toloy gejik ervokiraf gu avinkafa intakabapa is toloy ar gejik dere dem intakaba vox dem gemapaf yantuul, is kottan ison paasleyen gu tra is tceka) waleon delvejon rotigiyid ise, bravanon kev davafa gla ke Xipehuz tisik, ko aalxo rolaniyid. Artlanison va solumacka ke volnik, gejik dem avinkafa kaba godendayad ise gotrovgayad ise gopoayad da volnik di nisawer, ise kabakiraf tcekasik va bitej kan kaba ok tra sedme goaspil gokulmeyed. Oye mialukafe rane ke Xipehuz tisik va tanoy ladavacek is acku kaikfimiyr, va karnizeem deraykayá inde bak lanira divefa orala va ontime vas tanoy ladavacek is amu vamoe sid me kaikfiyir, nume batenide blagarama va levburexeem gluyas gu koefa orala burena gan nuba stapeckeyer. Larde ison Xipehuz tisik va guraf lirk me gruticnir ise anton ranyeson grupabdunir, pune ta gelbera kev sinyona davafa diltura karniz batinde envayan stapeyer. Efe, sin va minaf warzaf ervoeem di lasuganteyayad, nume konaktode di jupekayad, vexe larde sinaf tey sotid keskotansaf vome minafa tcekasoluma, ta lakoteyara di gonisaweyed. Ostik, larde mana sotir meverefa, kan kaliafa laniratiura loviele di roddivawayat.

5. Toleafa meldara

Bak 22649^e tamavilana, ba san-taneaf viel ke anyusteaf taelcek. Remi bat viel toleafa meldara kev Xipehuz tisik dilizeyer, ise okilik va ilamafa dirgara pu jin al deayad. Battode va saneem gu baroya ervolia solzarteyé. Vani vanawalt, va balem-kunoy gejik ervoayan sedme karnizaf bolk. Bata diltura tiyir gojafa leon dam tela ke pereaf viel. Grelt, sotre milk vuckunon deraykayan azu milk, va aalxo vion kolaniyid, aze kakevera tozuweyer. Remi taneaf bartiv tiyir gunton gu ayik larde Xipehuz tisik gan warzafa pendanaca zo xayeckeyed ; loa decemoya tazukinda xonukayad, ika biwe sanoy gejik.

Xipehuz tisik, ke J.-H. Rosny Aîné (4^{eafa} zixa ; wana titisa koe diref otuk)

Xipehuz tisik, gestaropaf berpotam (1887) ke J.-H. Rosny Aîné belgaf suterotik
Xanto : *Les Xipéhuz*, francavon, kalkotavayano gan Damien Etcheverry, 2014.
Dotay : Kotavaxak dem Suterot.




Artemisia Gentileschi (1563-1639) ~ Itali af lingesik


Grutepesa va lingeropa, Artemisia va alkafa nakila isu izvafa lajupartfir, i va oxi banugale torigini gu ani oluafi.

Roma (1593-1614)

Ina koe Roma bak 1593 koblir aze va zovdara is lingera koe lingexo ke Orazio Gentileschi gadikye raver. Bantel va Caravaggio nobar nume gan inafa lingerinda zo turestar. Yambafa nekinuca ke Artemisia Gentileschi vey Caravaggio kle tir mali rumeuca. Tisa san-perdafa bak 1610 va Susanna is toloye guazikye skur, i va trutca vey geltreva is listinda ke Caravaggio.



Wetce ayikya, va San Luca Cultim me ronodenfir, i va sistu lospasu va lingesikeem ke Roma is amuzesu va yambafa tavera. Batdume gadikye va ilkaf tavesik pu ina dafur, i va Agostino Tassi lingesik (1566-1644). Voxen bantel va Artemisia lajugriromeyar aze boer. Tassi va kurera rotuxadason abdizilir voxen ixam tir do kurenikya. Orazio Gentileschi gu papaf erkey arti konak aksat temotar. Alkaf enilt is malyerotafa ksubera banugale askid da ina san-anyustadafa zo naker enide va inafa volgunuca tumusad. Valevefa voda ke kristeva (zoesikya) is malyerotafa fikuca (nakera) va lana swavuca pakon razdatana gan yambafa warzera ke Artemisia ape co di nekid. Boesikye gu tanoya koflintafa tanda zo lanzar, neken bati restali tuke gijarotif nendasik zo nabildar. Yikya remi bata figapafa rekola wan linger. Kadimi jiz, Orazio va nazbeya gu Pietro Antonio Stiattesi firenzef lingesik kokurer. Tolonga va Firenze koirubar aze va balemoy nazbeik di koblid.



Firenze (1614-1620)


Artemisia Gentileschi va kiewatca koe Firenze gruper. Tir taneafa ayikya dostegana gu Cultim ta Zovdaropa. Medici dacik isu yasa va inaf fitc karolad. Va Galilei kotgrupaf altelopik (1564-1642) rungruper aze jontikedje di daalar. Bata rekola tir nazbukafa. Voxen kurenik ke Artemisia nijer meblodik ixalarsas is tubozapan. Ina va in bulur aze ko Roma bak 1621 dimlakir.

Roma az Venezia (1621-1630)

Va Roma mivvexon koirubar edje gadikye koe Genova re soker. Va Cassiano dal Pozzo grupelik is fukorlasik tunar. Va Nicolas Poussin (1594-1665) francaf lingesik dere nobamar. Inafa sposuca wetce deltusik tir gijafa voxen ta zikera va kolnapa dum berma ik uja ik wevala me zo narar. Acum wali 1627 is 1630 ko Venezia mallakir enide va jafasik banlize di trasir.

Napoli az Engla (1630-1633)

Wan aneyasa va jafara, Artemisia Gentileschi ko Napoli bak 1630 mallakir. Va lana kiewatca koe bata widava seotar nume va yon lingeks mu wevala skur. Orazio gadikye re tir winugaf lingesik va aboyikeem ke Charles I ke Engla nume koe London blir. Artemisia gan nafalik tis dotayepesik va trutca zo imaxur nume va gadikye bak 1638 ko London kazokever. [...]



Varaf teliz tigis koe Kotava Xadola dene Wikipedia. ~ Banliz : https://avk.wikipedia.org/wiki/Artemisia_Gentileschi

Recela 3 : Kanagawa

Recela 3 : Kanagawa tir balemeafa gweta ke sposaf gwetak vergumveltkiraf gu 53 recela ke Tōkaidō vawa (Tōkaidō Gojūsan-tsugi no uchi), zovdayan gan Utagawa Hiroshige niponaf yambik, is taneon piskuyun bak 1833-1834 gan Hōeidō.

Tōkaidō vawa tiyir vawapa wale Edo (re Tokyo) tiso kelu ke Shogun patectokilik is Kyoto gindafu kelu ke Nipona. Sareon gu Hiroshige, kotafa soluma tiyir vas mon 500 km- numen lanis koyasik bad mon toloya safta exuleyed.

Hiroshige va varaf gwetak dem 53 recela ke zalor zovdayar. Bata gweta (Ukiyo-e tazuk) tir lum-kirafa gu 37 × 25 cm- (ton Oban breviz). Tir bareafa ke enk ise va greelt koe Kanagawa kaatoer.

Greelt ke Kanagawa

Greelt koe Kanagawa tiyir bareafa recela ke Tōkaidō vawa.

Kanagawa tiyir ki ke refa Yokohama widavapa, gee Tokyo.

Kanagawa banugale tiyir dem moltap valey tegira nekina gan vawa.



Xantofa piskura : 1833-1834 gan Hōeidō



Piskura : Gyosho enk, 1841-1844 gan Ezaki



Piskura : Reisho enk, 1847-1852 gan Marusei



Utagawa Hiroshige lingesik
(1797-1858)

Varaf teliz tigis koe Kotava Xadola dene Wikipedia.

~ Banliz [https://avk.wikipedia.org/wiki/Recela_3_-_Kanagawa_\(gweta\)](https://avk.wikipedia.org/wiki/Recela_3_-_Kanagawa_(gweta))



TAMAVA IS TAWAVOPA

Puka Puka rinca, Tuamotu tursia



Bumafa rinca ke Tuamotu tursia, Puka Puka tirkon icde geef laksiwak vas $14^{\circ} 55' 40''$ is ronef wak vas $138^{\circ} 47' 36''$ koe geefa Pacifika welfa tigr, rone 185 km- male lopokefa rinca is arte 190 km- male Tahiti is arte 167 km- male Fakahina.

Ton tazuk tickir bargentimaf, rinca tir aptafa gu koefa anodama abrotcafa vas 1.7 km-. Welmot ke drakmaserk is anoda pakon adoneyena tir vas mon 4 km². Mante ke siday tir vas 0.5 km- iku 2. Varafe abrotce ke rinca tir vas 5.7 km- isen mante vas cugon 3 km-. Varaf welmot tir vas 5.4 km².

Te One Mahina wida vatalteon tigisa tir antafo irubaxo ke rinca, dem mon alub-sanoy vegeduks is tanoya vawa is konaka kelda dazanisa va acku ke ewala. Arak ke rinca tir kum bixe is uvendaxo. Varafa sanelia ke rinca bak 2012 tir vas 166 irubasik (195 bak 1988). Vugarn tid dotaxe is uja is dolta is bema.

Kore Puka Puka rinca tir ke Tuamotu tursia, pune voava ke sanelia tir tela ke Marqueses tursia (lenteon tigisa arte 500 km-), volse tela ke bata tursia.

Savsafa izva ke Puka Puka

Savsaf yolt ke rinca tiyir Mahina. Tana pilkovaca voldum arak ke tursia, tuke inafa anoda, tiyir da va lolistaf gerlantamard (*Margaritafera panasesoe*) warzeyer. Imboza moe piluda dere vudimeyed. Imboza tiyir baerdaf sulem ise gu lorik zo torigiyr.

Europaf tosasik

Puka Puka tiyir taneafa ewala ke Pacifika welfa worayana gan europaf tosasik. Drig ke Magalhães sposaf portugalaf tosasik (1480-1521) bak tanaksat ke 1521 divtotayar voxaze bak abic viel oxam zavzagiyr, awuzanon gu isk ke lavada is ilt. Soe birelik rotonayad ise va boniaxopo dem zveri frofasi va rinca wemton rotcabaneyed.



Bak 1616 Le Maire xollandaf tosasik isu Schouten va ewala gire kosmayad nume gu Honden Eylandt (Ewala dem vakol) yoltayad kiren va vakol moe domega male al kozwiyd.

Puka Puka moni 1850 vanpir francafo tawavo. Titi XX^{eafa} decemda, rinca zo tukristevar numazen adlutaxo bak 1916 zo tadler isen uja bak 1954 zo vegedur.

Ba 06/02/1992 Cliff apelk va rinca apkar.

Wikis va Te One Mahina wida male grocela

Tana lokiewafa ewala va wageyefay

Titi XX^{eafa} decemda, rinca va dalafa skapafa is seltafa romplekura ugalayar. Lan boniasik isu gertik isu okilik ke Fakahina rinca va ki ke sanelia ke Fakahina ko Puka Puka tire arplekuyud aze va sid kulaf gu goyna is tunji tuvodayad. Mon 35000 wageya zo anam-taplekuyud numen Puka Puka vanpiyir tana lokiewafa ewala ke tursia warzesa va wageyefay.



Wikis va duzuma bak 1950, is kototara va wageyefay

Vund

Sedme vund, Puka Puka tir koina ke taltefa nuga ke Hiro tiso tan lorik ke Polinesia. Bata omafa rinca va acagipis drakcanak aname varafa ewala is baroya cuisafa anoda ton frolguke dir. Te vai o Hiro tir taneafa anoda ise va ticawaltara emuder liz lavok gublisas va kotak dem birafa katca konir. Te vai o rupe toleafa anoda isteon do awalt ba mirasti gildunyor. Isen vuida ke Te vai Tahetahe anoda tisa tela logijafa tir divnira ke lava ke anoda ko bira.



Pia (Pritchardia thustonii),
katca tigisa koe Puka Puka

Koe Te One Mahina wida, konaka Pritchardia piafa katca koe matela poke vawa zo dizved. Pritchardia oxi dem mon bar-sanoya katca don Makatea pia tir kotkatcafi gu Pacifika welfa.




Ref wiksam va Te One Mahina wida

Dank ke Kumea

O Puka Puka
Tipaera'a o tōku tu puna
Fagu o tōku ariki
Kia hipa ake rā
Te tika o Puka Puka
Ua torikiriki
Kia hipa ake rā
Te tika o Puka Puka
Ua marorororo

Ey Puka Puka
Ambikafo vo
Fagu gazikya
Va Puka Puka mafelá
Adre awisa
Leve rubixa
Maneke mafelá
Va Puka Puka
Ton elzawa.



TELIZ

2^e bu : Hochdorf, Azilugal
2^e bu : Kotavaf Izvugalayak
4^e bu : Xipehuz tisik, berpotam
8^e bu : Artemisia Gentileschi, lingesik
9^e bu : Recela 3 : Kanagawa
10^e bu : Puka Puka rinca
12^e bu : Liwombura
12^e bu : Kuda ke Aisopos

LIWOMBURA

Tula va liwa ke lana ombaliwa watson gu alto.
Konaka gokosmana peryasafa ombaliwa.

Xantaza :

<https://kotava1837481.wordpress.com/2018/09/02/un-jeu-de-7-familles-en-kotava-2/>

Kotavusa virda

Virida kotavon sanelayana, nuyon is faston
romalvajana is rorubiana is rotamzilina.

Ickriluyun rokeem. PAG / DE.

Internetxo : www.europalingua.eu/KotavusaVirida

Bu : www.europalingua.eu/KotavusaVirida/4-e_otuk_02-2023

Sanegara : Toleaksat ke 2023. 4^e otuk.

Yunkeks is ewava : ewaveem abugaf gu roka ok
nuyon rotamuzen ok rictayan gan digisik.

5

Loma

AITO

UGA

FR
larme(s)

Ikuza



Rengafa remawisa eipkirafa plawa
divtraspusa mal iteem nope altokafa
kranavera ok kontera. Ikuza va itapoz
dere guabdar ise jupar da va zunes uolk
di divplekur.

alma - cot - im - fortay - **ikuza** - divcepa

Deaxoloc is valus idatcol

Deaxoloc, zavzagiyis kadime milkava, gan idatcol zo onkar. Rwoder ise kalir : « Efe grupé, idatcol, da ta rinafa estura zo baliké ; voxé enide volporon me di awalké, valul ise va jin stutesil !! » Edje idatcol valur ise deaxoloc stutedar, vakol ba lor vanvulted aze va idatcol toz tcabaned. In pu deaxoloc rwodeson kalir : « Rotaxe dolge jin ! kiren, larde tí atelonyik, yorda vol tir valura. »

Batinde, koncoba askina volkare goaspil, dace gina koe nuba, zo sotioltér.

Kuda ke Aisopos, -VI^eafa decemda
(kalkotavaks gan Yurani Andergan)

